

La Svizra en il Fond monetar internaziunal (FMI)

Il pli important en furma concisa

Il FMI è competent per la stabilitad dal sistem monetar e finanzial internaziunal. Dapi l'onn 1992 è la Svizra commembra e maina ina gruppera cun dretg da votar. Tras cussegliazioni e tras la concessiun da credits ha il FMI prestà ina contribuziun essenziala per dumagnar la crisa finanziala ed economica. Per meglierar ses dispositiv en cas da crisa ha l'organisaziun instradà differentas mesiras. Ina da quellas è l'augment da ses meds. A medem temp ha lieu ina refurma da las quotas e da la gestiun che duai conceder als novs pajais industrials dapli dretgs da cundecisiun.

Il mandat dal FMI

L'incumbensa principala dal FMI è quella da surveggiar la politica economica da ses stadiis commembres. Uschia gida el a stabilisar il sistem finanzial e monetar internaziunal. A ses stadiis commembres porscha el agid tecnic e pussaivladads da scolaziun per als rinforzar tar la formulaziun e tar la realisaziun d'ina politica efficazia en il sectur da l'economia e dal martgà da finanzas. En crisas gida el ils stadiis commembres pertutgads cun agids finanzials cumplessivs e cun elavurar programs da refurma per lur politica monetara, budgetara e dal martgà da finanzas.

Commembranza svizra en il FMI

La Svizra è daventada commembra dal FMI l'onn 1992. Ella presidiescha ina gruppera cun dretg da votar, a la quala appartegnan actualmain l'Aserbeidschan, il Kasachstan, il Kirghistan, la Pologna, la Serbia, il Tadschikistan ed il Turkmenistan. Actualmain ha la gruppera ina quota da vuschs da circa 2,8 percents. Tras l'entrada en vigur da la refurma da las quotas e da la gestiun vegn questa quota a restar pli u main sco ch'ella è. La cumpart da la Svizra vegn dentant a sa reducir dad 1,45 ad 1,21 percents.

La primavaira 2012 è vegni signà in «Memorandum of Understanding» cun la Pologna che prevesa che la Svizra partia sia sedia en il Cussegli executiv dal FMI cun la Pologna. Il Cussegli executiv è l'organ da decisiun operativ dal FMI. Previsa è ina rotaziun dal directur executiv dal FMI en in ritmus da 2 onns. La Svizra mantegna dentant la direcziun surordinada da la gruppera cun dretg da votar. Ella represchenta vinavant questa gruppera en la Cumissiun monetara e finanziala internaziunalala (IMFC), l'organ directiv ministerial dal FMI. En questa cumissiun vegnan definidas la politica e la strategia dal FMI.

La commembranza en il FMI vegn administrada cuminaivlamain dal Departament federal da finanzas (DFF) e da la Banca naziunala svizra (BNS).



Schweizerische Eidgenossenschaft
Confédération suisse
Confederazione Svizzera
Confederaziun svizra

Departament federal da finanzas DFF

Augment dals medis finanzials dal FMI

En vista a la crisa finanziala ed economica ha il FMI deliberà ina seria d'agids finanzials ed ha activà en quest connex ina part considerabla da sias resursas. La summa totala dals medis finanzials è pia vegnida augmentada:

- Ils medis da las «Novas cunvegnes da credit», l'ancra per la segirezza finanziala dal FMI en temps da crises sistemicas, èn vegnids augmentads il mars 2011 da circa 52 milliardas USD a circa 567 milliardas USD. La part da la Svizra è creschida da 2,3 milliardas USD a 16,8 milliardas USD.
- L'avrigl 2012 è vegni decidì in augment extraordinari dals medis finanzials dal FMI. Tut en tut vegnan 39 commembres a metter a disposiziun al FMI ulteriuras 461 milliardas USD. La Svizra ha empermess ina contribuziun da maximalmain 10 milliardas USD.
- Cun l'entrada en vigur da la refurma da las quotas e da la gestiun, ch'è vegnida concludida l'onn 2010, vegn la summa totala da las quotas dal FMI (quai èn ils medis finanzials ordinaris dal FMI) redublada a 735 milliardas USD. La quota svizra vegn a crescher da 5,2 milliardas USD ad 8,9 milliardas USD.